

Patrick de Carvalho GALkideak bere buruaz beste egin du presondegian

Tomas Perez Revilla errefuxiatua hiltzeagatik bizi osorako zigorra ezarri zioten

Hur Gorostiaga / Baiona

Patrick de Carvalho GALkideak bere burua hil zuen astearte arratsean, St. Maureko presondegian. 1984ko ekainaren 15ean, Miarritzen, Tomas Perez Revilla errefuxiatua hil eta Roman Orbe zauritzeagatik bizi osorako presondegi zigorra betetzen ari zen. Chateaurouxko Auzitegiak ez du heriotzari buruzko ikerketarik eginen.

HERENEGUN goizaldean hil zen Patrick de Carvalho GALkidea, St. Maureko presondegian. Urkatutik atzeman zuten zaindarien. De Carvahok, Roland Sampietro, Jean Philippe Labade eta Jean Pierre Bounin GALkideekin batera, 1984ko ekainaren 15ean Tomas Perez Revilla eta Roman Orberen aurkako atentatua egin zuen. Tomas Perez Revilla 1984ko uztailaren 27an hil zen, atentatuan izandako zaurien ondorioz.

Carvahok 14 urte zeramatzan presondegian, eta ez zitzaion asko falta kalera ateratzeko. Saint Maureko presondegiko ziegan bakarrik omen zegoen bere buruaz beste egin zuenean. Atzo hedabide batzuek besterik adierazi bazuten ere, Indre eskualdeko Chateaurouxko Ministerio Fiskalak ez du inolako ikerketarik irekiko



Patrick de Carvalho, epaitegitik irteten.

heriotzaren inguruan, «bere burua hil duelako dudarik izateko arrazoirik ez dago».

Carvalho oso pertsona adierazgarria da GALEn, Perez Revilla hil baino egun batzuk lehenago Carvalho eta Sampietro Simone Veil Frantziako ministro ohi eta Europako Parlamentuko lehendakariordearen segurtasun lanetan ibiliak ziren Pauen. Are gehiago, SRPJ polizi taldeko kideek komandoko lau kideen atzetik ibili ziren atentatuaren aurreko

egunetan, baina poliziek ez zuten ezer egin atentatua saihesteko, ez omen zekitelako atentatua prestatzen ari zirela. Atentatua gertatu eta ordu gutxira laurak atxilotu zituzten, baina egun gutiren buruan Bounin eta Labade aske utzi zituzten. Jakina zen bi horiek bonba-motorez egindako atentatuan parte hartu zutela, baina «prozedurako hutsegite bat» zela medio, kargurik gabe libre utzi zituzten. Garai hartan hamabi GALkide baino

gehiago utzi zituzten aske, «prozedurako hutsegiteak» zirela medio.

Ondotik, Labade GALEko buruetarik bat izan zen. Taldeko lau kideetarik bakoitzak 150.000 libera jasotzekoak zituen ekimenarengatik. Carvalho eta Sampietro bizi osorako presondegira zigortu zituzten auzitegian. Ekainaren 15eko atentatua, Barrio-nuevo eta Deferre Espainiako eta Frantziako Barne ministroen arteko bilkuraren bihar amuneari izan zen.

Hamar GALkide hil dira dagoeneko

DE CARVALHOREKIN hamar dira hil diren GALEko Frantziako adarreko kideak. Bernard Foucher 1997ko uztailaren 15ean, Fresnesko presondegian, «bat-bateko bihotz kolpe», nahiz eta medikuek gaitzik ez zuela ziurtatu. Pedro Sanchez 1985eko agorrilean hil zen, minbiziz; *Diario 16* egunkariaren arabera, berriz, GALEk ordaindutako Gradignaneko presondegiko sendagile eta zaindari batek eman medikamentu batek hil zuen. Marie Jeanne Puyo, Batallon Vasco Español (BVE) ibilitakoa, 1984an hil zen, Tenerifen, GALEko barne tirabiren ondorioz, Frantziako Poliziak azaldu zuenez. Liliane Satin presondegitik ateratzean hil zen. Paul Raguet 1984ko udan hila atzeman zuten, Tenerifen. Urte berean Joseph Couchot hil zuen GALEk, Iruenen. Mohamed Khia, berriz, Frantziako Poliziak hil zuen, ustez zeramaten furgoitik eskapatu nahi zuela eta. Guy Metge PAFeko poliziburua auto istripuz hil zen, errepide zuzen batean zihola, jakin ez diren zioengatik desbideratu ostean. Jacques Castets polizi minbiziz hil zen. Jean Pierre Cherid, OASEko kide ohi eta BVEn ibilia, 1984an hil zen, Miarritzen, auto baten azpian lehergailu bat ezartzen ari zela.

Sakabanaketa kritikatu zuten epaileak zigortzeko aukera salatu du Olabarriak

■ CGPJko kidearentzat, adierazpen askatasunaren «aurrekari txarra» litzateke

Agentziak / Bilbo

EMILIO OLABARRIA Botere Judizialaren Batzorde Nagusiko kideak (CGPJ) atzo azaldu zuenez, 16 epaile sakabanaketa kritikatzegatik zigortzea «aurrekari txarra» izango litzake magistratuen adierazpen askatasunarentzat. Izan ere, 16 euskal epailek egindako idatzia Diziplina Batzordera bidaltzea erabaki du CGPJk, legehausterik dagoen ikertu eta, hala bada, dagokion zigorra ezartzeko. Botere Judizialeko Lege Organikoak dioenez, magistratuek ezin dute Gobernu

gaitzetsi edo zoriondu, eta idatzi horretan halakorik gertatzen den ikertu beharko dute.

«Bidegabekeria bat da, adierazpen askatasuna bortxatzen baitu. Izan ere, epaileek, gizaki bezala, beraiei dagozkien gaiet buruzko iritzia emateko eskubidea dute; eta, kasu honetan, espetxeetako legea ekimen judizialari dagokio», esan zuen Olabarriak. Bestetik, adierazi zuen magistratuen idatzia ezin dela Gobernuaren lanari egindako gaitzespen gisa hartu, «ezin baita zalantzan jarri epaile hauek idatzia egi-

terakoan zuten asmo ona». Olabarriaren ustez, epaileak zigortuko balituzte, «aurretiazko zentsura edo autozentsura moduko bat» izango litzateke, eta ez luke ezer onik ekarriko etorkizuneari.

HB: «Hori biolentzia juridikoa da»

Herri Batasunak ere gogor kritikatu zuen atzo CGPJren erabakia. «Botere Judizialaren Batzorde Nagusiak 16 epaileri zigor-espedientea zabaltzeko hartu duen erabakia izen bat baino ez du merezi: biolentzia juridikoa,



DAVID AGUILAR / EFE

Emilio Olabarria, CGPJko kidea.

esan zuen HBk, ohar baten bidez.

HBren ustez, «presoak Euskal Herriratzeko gizarteak egin duen oihuarekin bat

eginez idatzitako iritzi artikulua zigorgarritzat jotzen duen Botere Judizialak herri honen aurkako jarrera erakusten du».